

Nekazaritza aurrekontuak ez murrizteko eskatu du EHNEk

GASTEIZ

Euskal Autonomi Elkarteko aurrekontuen inguruan Nekazaritza Sailekoak ez murrizteko eskatu du Euskal Herriko Nekazarien Elkartasunak. Fondo publikoen gestio eredu berria proposatu du EHNEk, «klientelismoa alde batera utzi eta heziketa, antolaketa, merkataritza egitura eta nekazaritzako elikagai industrien laguntza arloetan sektoreak dituen beharrei eraginkortasunez erantzutera bideratzeko».

1993an Eusko Jaurlaritzako Nekazaritza eta Arrantza Sailak 8.800 milioi pezetako (352 milioi libera) aurrekontua izan zuela eta hurrengo urtean 8.000 milioira jaitsi zela nabarmendu du sindikatuak. Ildo honetan, aurrekontuak murriz ez daitezzen eta 1993ko maila berreskura dezaten Gasteizko Administrazioarekin eta Legebiltzarreko talde guztiekin bildu dira EHNEko ordezkariak.

Iazko kontratuen % 20 eredu berrietakoak dira

GASTEIZ

Euskal Autonomi Elkartean iaz egin ziren kontratuen % 20 inguru lan erreformak jasotzen dituen hiru kontratazio eredu berriei dagozkia adierazi zuen atzo Ramon Jauregi Eusko Jaurlaritzako Lan sailburuak.

Gasteizko Legebiltzarrean azaldu zuenez, guztira egin ziren 280.000 kontratazioetatik % 16 denbora partzialerako kontratuak izan ziren, % 1,54 praktiketakoak eta % 2,08 ikasketak motakoak.

Kontratazio eredu hauek 1993tik 1994ra izan duten hazkundea nabarmendu zuen sailburuak. Bere iritziz denbora partzialerako kontratuak % 47 gehitu dira, praktiketakoak % 1,291 eta ikasketetakoak % 61. Datuok lan erreformak «funtzionatu» duela erakusten dute Ramon Jauregiaren arabera.

Iaz egin ziren kontratuen erdiak baino gehiago zerbitzu sektorekoak izan ziren, eta % 30 inguru industrian gauzatu ziren.



LABeko ordezkariak Nafarroako Legebiltzarrean bildu ziren diskriminazioa salatzen.

JOXE

ELA ezezik, LAB ere sartuko da Nafarroako Kontseilu Ekonomikoan

KESen egoteko eduki beharreko ordezkaritza % 10ean utzi dute

Nafarroako Parlamentuak Kontseilu Ekonomiko eta Sozialaren osaketa berria onartu zuen atzo. Parlamentuak arautu duenez, % 10etik gorako ordezkaritza duten sindikatu guztiak izango dira KESen. Aldaketa horri esker ELA ezezik LAB ere sartuko da orain arte sindikatu abertzaleentzat itxita egon den erakunde horretan.

A. UNANUE / IRUÑEA

UPN alderdiak LABen sarrera galarazteko egin zituen ahaleginak antzuak gertatu dira azkenean, PSN-PSOE, HBk, EAK eta IUk bat egin baitzuten Gobernuak aurkeztutako lege proiektuaren zenbait punturen aurka.

Gobernuak % 15ean finkatu

nahi zuen sindikatuak KESen egoteko behar zuten ordezkaritza maila, nahiz eta jatorrizko proiektuan % 10 besterik ez zen eskatzen. Arrazoi politikoak zirela medio, UPNko zuzendaritzak lege proiektua aldatzera behartu zuen Gobernuak, «KASen inguruko sindikatu batek» Nafarroako erakundeetan egotetik ez zeukala argudiatuta. Gobernuak ordezkaritza maila % 15era igo zuen orduan, ELAren sarrera ahalbidetuz, baina LAB kanpoan utzita.

Erabaki honek sindikatu abertzaleen haserrea eragin zuen, LABena batez ere. Sindikatu honetako ordezkariak Nafarroako Gobernuaren egoitzaren parean elkartu ziren atzo eguerdian, protesta modura, KESen osaketa berria «demokraziaren aurkakoa eta baztertzalea» zela salatzen. Artean ez zekiten arratsaldean Parlamentuan zer gertatuko zen.

Parlamentuan bat egin zuten

oposizio alderdi guztiek eta zuzenketa bateratua aurkeztu zioten UPNren proiektuari. Zuzenketaren bitartez % 15etik % 10era jaitsi zuten KESen egoteko eduki beharreko ordezkaritza maila. Oposizioak beste aldaketa bat lortu zuen: Nafarroako Unibertsitate pribatuko ordezkari baten ordezkari talde ekologistetako bat izango da KESen.


UPNren kontrako botoarekin onartutako lege proiektuaren arabera, Nafarroako KES berria 28 ordezkari osatuko dute. Horietatik zazpi Gobernuak berak izendatuko ditu eta zazpi horietatik bi Nafarroako Udal eta Kontzeju Federaziokoak izango dira. Enpresariak eta sindikatuak ere zazpina ordezkari izango dituzte.

Azkenik, kooperatibek eta elkartek laboralek bi ordezkari izango dituzte eta kontsumitzaileek, UAGNk, EHNEk, talde ekologistek eta Nafarroako Unibertsitate Publikoak bana.

Espainiako Bankua kapitalen zirkulazio librea murrizteko neurrien aurka dago

MADRIL

Pezetaren aurkako espekulazioak eragozteko, kapitalen mugimendu liberaren aurkako neurriak «ez dira ez gomendagarriak, ez eraginkorak, eta oso garestiak dira», adierazi zuen atzo Luis Angel Rojo Espainiako Bankuko gobernadoreak Madrildako Legebiltzarrean. Nazioarteko inbertsoreek merkatuetan pezetaren inguruan agertu duten mesfidantzaren arrazoiak «Espainiako egoera politikoaren inguruko zalantza» eta «nazioarteko moneden koordinazio desagokoa» direla ziurtatu zuen.



Luis Angel Rojo.

EFE

Egoera politikoak merkatuetan duen eragina dela eta, Rojok azaldu zuen arazo politikoak oztupo izan litezkeela neurri ekonomiko egokiak hartzeko. Horrefaz, Espainiako ekonomiararen arazo nagusietako bat defizit publikoa dela azaldu zuen, eta arazo hau lehenbailehen konpontzeko eskatu zuen.

Rojok ukatu egin zuen Espainiako Bankuak kapitalen mugimendua oztopatzeko neurriak hartuko duela. Horrelako neurriak hartzea nazioarteko akordio baten ondorioa izango litzatekeela azaldu zuen, «ez estatu bakar baten erabakiaren ondorioa».

LABURREAN

ETXENIKE

Arrasateko Enpresa Zentroaren alde

Guillermo Etxenike Gipuzkoako diputatu nagusiak Arrasateko Enpresa Berritzaileen Zentroaren alde dagoela adierazi zuen atzo, bertako sindikatuak kontrakoa uste duten arren. Hala ere, Etxenikek Gipuzkoan horrelako zentroetarako egitura bakar bat zabaltea proposatu du, Europako Batasunak zentro bakoitza 250.000 biztanlerentzat izatea gomendatzen baitu.

VITALEK % 9,71 gehiago irabazi zuen

Arabako Vital Kutxak 3.626 milioi pezeta irabazi zituen 1994. urtean, urtetik urtera emaitzak % 9,71 hobetuz, entitateko iturriek atzo jakinarazi zuten. Kutxa honen bezeroen baliabideak 280.000 milioi pezetara iritsi ziren (% 16,76 gehiago). Maileguak, berriz, % 2,94 gehitu ziren eta 171.000 milioi pezetara iritsi ziren.

FEVEko langileen greba astelehenean

FEVE tren konpainiako langileek greba egingo dute datorren astelehenean, zuzendaritzari hitzarmen kolektiboa sina dezan exigitzeko. Grebak eragina izango du Bizkaian, eta probintzia honetako langileek Madril enpresaren egoitzaren aurrean egingo den kontzentrazioan hartuko dute parte. CCOO eta UGT sindikatuak salatu dutenez, enpresak langileen eros-ahalmena «murriztu» nahi du.

BILBOKO

autobusetan greba apirilean

Bilbo barruko garraioaz arduratzen den Transportes Colectivos SA konpainiako enpresa batzordeak lau orduko grebara deitu du apirilaren 5, 7 eta 10erako, eta egun osokora hilabete bereko 12, 24 eta 28rako. Zuzendaritzak lanorduak gehitu, antzinakotasuna izoztu, soldatarik ez igo eta indarrean dagoen hitzarmena apurtu nahi duela salatu dute langileak.